



11. april 2022

UKA2022/91

Inatsisartut suleriaasianni §33 naapertorlugu Inatsisartunut aalajangiiffigisassatut imaattoq matumuuna saqqummiuppara:

**Naalackersuisut aningaasanik nuussuisarnerit transferpricingimik taaneqartartut maleruagassaannik nalilersuinermit UPA2023-mi agguaassinissamik peqquneqarnissaannik Inatsisartut aalajangiiffigisassatut siunnersuut. Tassani siunertarinearpoq, akileraartarnermi pilersaarusiortnermi annertusiartortitsinnginnissamik pinaveersimatitsineq qulakkiissallugu, inatsisillu sukatigassaanersut, taakkua ataaniillutik attuumassuteqartoqannginnissamik periutsip eqqortinneqarnera.**

(Siumup Inatsisartunut ilaasortaaitai)

**Tungavilersuut:**

”Transferpricing” pillugu nunatsinni eqqartorneqarnera akulikilliarporpoq. Aammalu una qulequtaq pillugu maani Inatsisartuni qaqinneqartareerpoq partiiniillu tamanit isumaqatigineqarlerni akuersissutigineqartareernikuugalualuni. Taamaattorli suli Inatsisartut tamatumap Naalackersuinikkut naammassineqarneranik agguaassivigineqarsimangillat.

”Transferpricing” tassa suliffeqarfissuit ingerlatsiviisa, piginneqataaffigisami iluini aamma ingerlatsiviit aalajangersimasut akornanni nuussuinerit soorlu akiisa aalajangersarneqartarnerat aningaasanik nuussuisanerup imarisarpaa. Tamanna namminerminik inerteqqutaanngilaq, taamaattorli pisisat nalitoorujussuit piginneqatigiiffiit akunnerminni nussornerisigut tungaviusumik attuumassuteqanngitsumik ingerlanneqartariaqartoq isumaqarpunga. Ima paasillugu, suliffeqarfiit pigisaminnik nalilinnik nuussuinermit akit piumasaqaatillu, allanik attuumassuteqanngitsunik assigusunik nuussuinermit akinik piumasaqaatinillu aalajangigaannut naapertuuttariaqarput. Attuumassuteqannginnermillu periuseq ATORNEQANNGIPPAT, iluanaarutaasup nuunneqaratarsinnaanera aarlerinarsinnaammat – tamannalu sumi, qanorlu annertutigisumik akileraarutitik akiliinissamut sunniuteqarsinnaalluni.

Siammasissumik paasinnittaaseqartoqannguatsiarpoq, suliffeqarfiit ilaasa annertusiartortumik akileraartarnermit pilersaarusiortnermit atuisarnerannik, piaaralutillu nunatsinni akileraarummik akiligassaminnik killilersimaarinnittarnerat. Naatsorsuutigilluinnarpara tamatta maani soqutigisarigipput, paasissallugu aammalu qulakkiissallutigu pisuussutigut suulluunniit eqqortumik nalilimmik aammalu nunatsinnut pitsaanerpaamik iluanaarutigineqarsinnaanissaat qulakkeerniarlugu inatsisit malillugit akileraarummik akiliisoqartarnissaa – taamaammat naleqquttuusoraara pingaartipparalu nalilersorneqarnissaa, aningaasanik nuussuisarnerup inatsisai ajunnginnerisut,



imaluunniit annertusiartortumik akileraartarnermut pilersaarusionerup pinngitsoortinneqarnissaanut sukatiqassaanersut paasilluarnissaat, taakkua ataaniillutik attuumassuteqannginnermi periutsup malitsinneqarnera.

Inuiaqatigiit kalaallit pisuussutaat tamarmik qanoq naleqarnersut aammalu avammut niueruteqarnermi tunisinermi iluanaarutit qanoq ingerlaartinneqarnera paasisariaqalerpaat. Nalilersuineq imaattoq nunamut inuinullu pitsaasumik allannguuteqartitsisinnaavoq, taamaattumillu angusassatut anguniagassaasariaqarpoq.

**Pisortanut aningaasatigut allaffissornikkullu kingunissat:**

Qulaani taaneqartoq nalilersuinerup suliarineqarnera missingersorneqarpoq AC ataaseq ukioq ataaseq atorineqassasoq tamannalu 500.000 kr. Missaani naleqassasoq.

**Namminersortunut inuussutissarsiutilinnut aningaasatigut allaffissornikkullu kingunissai:**

Qulaani taaneqartoq nalilersuinerup namminerminik aningaasatigut allaffissornikkulluunniit namminersortunut inuussutissarsiutilinnut sunniuteqarnissaa naatsorsuutigineqanngilaq – apequtaassaarli Naalakkersuisut inuussutissarsiortunik nalilersuinerup nalaani akuutitsissanersut.

**Innuttaasunut aningaasatigut allaffissornikkullu kingunissai:**

Soqanngilaq.